

## **Ufficio Stampa della Provincia autonoma di Trento**

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

### **COMUNICATO n. 1665 del 16/06/2025**

**Dai 15 de jugn ai 7 de messèl la sarà a la leta del publich te Cèsà de Comun de Cianacei.**

## **La Majon di Fascegn met fora la mostra “Alcide De Gasperi. Album di casa”**

**[Ladino]** L é stat inaudà te Cèsà de Comun de Cianacei la mostra "Alcide De Gasperi. Album di casa". Album di casa" rencurèda da Marco Odorizzi e Elena Tonezzer, vegrada ca da na idea de la Presidenza del Consei de la Provinzia Autonoma de Trent en colaborazion con Fondazione Museo storico del Trentino e Fondazione trentina Alcide De Gasperi. La mostra, de gra al endrez del Istitut Cultural Ladin "Majon di fascegn" e al didament del Comun de Cianacei, la restarà te Fascia fin ai 7 de messèl, do da esser stata metuda fora utró tel Trentin e ence foravia, olache la é stata muie aprijièda da duc per aer tratà l argoment con sensiboltà e cher.

L'espozition met dant fotografies mai publichèdes leèdes a la familia apede ai scric più personèi del politich trentin, per ge dèr l met a la jent de cognoscer i evenc de maor valuta de sia vita e i valores che ge à dat fondament a sie pensier, lascian sul sfon demò per n medeat l empegn politich.

N pont de veduda fora de anter, donca, per meter adum n tribut a Alcide De Gasperi, pissà per recordèr i setanta egn da sia mort.

Te Fascia, la mostra su De Gasperi vel recordèr a na vida sorida e piajegola la istoria de chest statist, protagonist del destin di popui de noscia region, e ge meter apede n auter picol tassel: n retrat del veie restorant "Marmolata" (ades "Maria") sun Pordoi ti egn Vint, autografa da De Gasperi del 1952, canche l é stat te chesta ostaria veiora. "Cherdon che chest document unich, che per solit fèsc bela parbuda te Rifugio Maria, l passenee delvers con i sentimenc fons e dal cher fora, porté dant da la mostra e soraldut l se conjobie con un di retrac metui fora, che moscia De Gasperi sun Pian de Schiavaneis che ge vèrda su maraveà al Sela" declarea la Presidenta del Istitut Cultural Ladin e del Museo Ladin de Fascia, Tea Dezulian, che à podù aprijièr l projet dantfora e l'à volù l portèr te val.

La meticolousa selezion di scric de De Gasperi met al luster sia idees pojèdes sui valores democratici più fons e su na vijion de la politica vivuda desche na miscion, ma tel medemo temp la lascia vegrada fora duta la emozions di evenc personèi, vedui te sia viesta da ogne dì.

Duc i tes de la mostra i é a la leta tras qr-code per todesch, per ingleis o ence dic su a ousc, acioche posse se emprevaler l publich più gran.

N excursus dai colores vives te la vita de n om, dant dal dut, segnà da sie picoi recorc de canche l era bez e joenet, de la noza, di viajes e di momenc de paussa passé con chi de cèsà sa mont, ma che tel medemo temp fèsc vegrada fora ence sia fermeza tel ge jir do a sie obietives e l met amò miec al luster na fegura de gran respet, benvoluda e tegnuda da duc desche model de bona politica, de ferstont e de gran anteveder.

La Mostra “Alcide De Gasperi. Album di casa” restarà orida te Cèsu de Comun de Cianacei dai 15 de jugn ai 7 de messèl 2025, duc i dis da les 8.30 a les 12.30 e da les 15.00 a les 19.00; dai 30 de jugn l'orarie sarà fora e fora da les 8.30 a les 19.00; l'entrèda la é debant.

(pc)